

茗齋詩餘
二





餘詩齋茗

(二)

著貽孫彭

王雲五主編
叢書集成初編

茗齋詩餘
二冊

中華民國二十五年六月初版

周

著者 彭孫貽

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

茗齋詩餘卷二

漢宮春

吳山雪霽。用康伯可韻。

何處湖天。只茫茫雲海。冷迷凍鵲。琳宮環珮風馬。琤琤天樂。春回萬木。一枝枝瓊條瑰萼。此處斷塵凡。不是飛仙也。翔寥廓。湖山笑人輕薄。恨瑤臺伴侶。負他舊約。檠珠托宿。倚徧織綃樓閣。江妃贈我玉芙蓉。曉寒零落。因風寄相思尺素。雙鯉銀鈎撼却。

和伯旃客感

秋氣悲哉。漸西風落雁。朔管吹蘆。多少龍泉燕市。笳馬魚鳧。南柯蟻鬪。夢同時半枕胡廬。淒涼煞暮雲官樹。斜陽冉冉寒蕪。顛悴天涯作客。伴殘燈孤店。餘雪長途。腸斷天寒翠袖。幽夢熏鑪。故園何處。江天外煙月吳都。聽不到菱歌水調。清商子夜棲烏。

倦尋芳

本意。用王大祝韻。

花身影正。睡眼紅銷。徐起中晝。雲亂屏山。猶戀雙鴛衾繡。閒殺東園
秋千影。垂楊風逆。鶯飛透。惜春殘。怕尋芳徑冷。杜鵑相候。幾多日
朱銷粉倦。絃指生疎。冷落箏手。懶畫眉兒。不喜畫眉兒鬪。剛則雕籠
啼一轉。遠山蹙過顰痕舊。甚情悰。把花枝。轉添人瘦。

詠燕。次子黃韻。

畫巢香乳。藻井泥融。梨花深院。到處雙飛。紅雨不教吹散。掠鏡頻窺
釵鈿小。穿簾低入樓臺徧。是誰家。烏衣人物。依稀曾見。聽玉樹庭
花歌斷。水榭磯寒。平蕪煙暖。金粉六朝。東去伯勞非遠。細雨斜飛金
翦下。輕風巧避晴絲捲。乍歸來。午眠時。海棠春倦。

醉蓬萊

和屯田老人星見應制韻

宋仁宗禁中秋宴。太史奏老人星見。命詞臣爲樂章。屯田應制詞。漸亭臯葉下。帝覽詞。首漸字。天顏不怡。至宸遊鳳輦何處。又暗合御製眞宗輓詞。御容慘然。至太液波翻。帝曰。何不云波澄乎。擲之地。不復擢用。按屯田詞。於老人星見。並未一言形容。明主具眼見斥。不特觸諱已也。爲改定一章。仍次其韻。

正銀河夜永。碧落秋高。天街澄霽。南極光輝。拂參旗雲氣。萬歲山開。長生殿啓。老人星照砌。喜動天顏。歡騰黃屋。玉繩映水。四海無塵。一人有慶。樂奏仙韶。花陰徐遞。試候江湖。有異人應瑞。鶴骨奇姿。龍顙短下。美童顏韶脆。璿璣不動。山河影靜。桂輪香細。

秋閨。次子黃韻。

見明河清淺。烏鵲驚枝。嫩涼庭榭。露禱雙星。冷紅銷虬炙。梧葉頻飛。
半輪斜轉。掛雙鴟銀瓦。欲擘瑤笙。生疎纖指。沈吟花下。暗拭檀痕。
閒思往事。共剔秋燈。一宵情話。恨殺荒雞。催紫騮早跨。三十六鱗。十
三行字。雙鯉書空寫。小院流螢。照人獨自。空牀遙夜。

癸丑七夕。題醉仙圖。爲邱母壽。

正仙萸七展。靈鵲雙飛。婺星降夕。清露新桐。洗天河一碧。金鳳花明。
玉船藕脆。佐壽觴浮白。香粉筵開。舞綵衣前。穿鍼樓側。何處丹青。
貌出羣仙。鹿脯麇巴。洗酣倒劇。爲問茅容。可多儲胥炙。此日填門。幾
何車馬。軋軋牛輶。鸚武樽中。玉山頽處。誰如此客。

聲聲慢

和易庵秋閨

自眠自起。自歎自嗟。自憐自笑。自戚。已自難捱。何況暗蛩聲息。一絲

兩絲氣力。怎覈能髻鬟梳急。不道已是秋深。看到菊花纔識。單枕被池重積。鎮日睡長把翠翹都摘。鏡裏容顏。能得幾時鬢黑。臨風暗彈素袖。又零星三滴二滴。箇情緒。問薄倖心上過得。

七夕病中

一痕秋碧。半簾湘文。印臂花影纖穠。燒藥紅兒。夜分頭觸屏風。曲闌干外私語。獨眠人只有愁儂。天如洗。看匏媧左側。烏鵲橋東。懊惱人閒天上。只多情難懺。藕孔玲瓏。幾度暗銷衣骨。費盡鍼工。願繅乞巧蛛絲。喚玉清共擘輕容。醉擁著。睡鮫綃槐郡夢中。

暗香

和白石梅花

淒淒夜色。且醉扶紅袖。倚樓橫笛。喚起玉龍。斜月鱗鱗曉星摘。回首故人天際。欲書寄瑤華無筆。誰共我枕石山中。霜冷露盈席。南國。

音信寂。縱千里相思。方寸堆積。悲吟當泣。不是思君定誰憶。猶記一枝送影。香夢入羅浮空碧。柰可翠禽叫轉。不歸也得。

帝臺春

春恨。用南唐元宗韻。

花影脈脈。春愁黯無力。成陣亂紅。不管人愁。無風飛急。冷落秋千上已後。較愁似去年今日。問多情燕子。剛來。天涯消息。歸未得。守月直。到燈黑。儘夜夜朝朝。淚痕多。準不過一江潮汐。人去今春已非舊。春去那人可如昔。便儂做東風。肯花枝憐惜。

長亭怨慢

別怨。和白石韻。

是何處流鶯低語。不道高樓。有人閒倚。飛絮漫天。馬蹄蹂碎暗塵裏。青山江尾。堆積到愁多處。山自不銷愁。何苦兩峰窩。雲斂碧聚。春

江非有淚。那只管流難住。縱饒是淚也。和雜楚天風雨。是不合獨自憑闌。見無限江山如此。取次若重來。無杜鵑時方許。

送別。次子黃韻。

行折柳灞橋西柱。芳草萋萋。雕鞍纔據。燕子剛來。忽忽共作河梁語。馬蹄雖住。先負離情東去。無計爲君留。不是不留人。春盡已暮。聽檀槽銀背。疊到渭城三句。野館濃花。空極望隴雲秦樹。知今夕旅夢誰邊。指一帶遠山多處。此地卽天涯。况又天涯前路。

入聲甘州

夏夜聞蛙。用青田韻。

青田詠蛙。小有思致。未極才情。結語灑灰。似燒琴煮鶴。因用其調。賦以見意。頗謂勝之。

聽池塘青草鬧終宵。亦何減塢篴。笑巴童井底。禿廝紫色。駭帝園池。

只有憑車烏喙。啄矢沼吳時。偏愛他強聒。餘怒鳴悲。合向幽人林下。代箎絃絲竹。軋札呀呷。更談諧調笑。白出紫之詩。道先生家無伎樂。送歌兒一部盡青衣。問誰到蝦蟆陵下。讀曲從師。

秋怨和柳五

憶當年匹馬向潯陽。白雲渡河秋。正天橫霜雁。山明驛火。風入江樓。最是江聲送客。日夜豈曾休。不管歸期未。先自東流。回首鄉關千里。漸渚蘋汀鷺。殘照將收。任雲山留我。難爲鷓鴣留。想倚闌舊時人在。幾夢中隨我上孤舟。又誰道夢中人返。反爲伊愁。

孤鸞

本意

屏山舞雉。問寡鵠情悰。離鴻消息。目斷青霄。何事不如比翼。東風容易吹轉。不肯送天涯歸客。如此暗窗疎雨。可梨花禁得。縱梨花禁

得也誰惜。祇對影纔雙。除影只一。恨比空江水。能深幾多尺。誰道春光解恨。算只有斷腸春色。分付流鶯漫轉。夢回時剛則。

瑣窗寒

旅中對雪。次子黃韻。

羈棲櫪馬。凍咽荒雞。淒淒朔氣。千山路斷。似臥窮荒沙際。念空山白石孤煙。悵霜枕紅情雙繫。早驚寒鴉陣。戍旗殘角。征人將起。不是淹歸計。信一笠煙蓑。羊裘篷背。夢裏還家。屈戌銅環忘閉。悔別時容易天涯。拚今宵兩鬢同醉。任西風舞盡梨花。并作離人淚。

無悶

有憶

青瑣翠圍。綺窗朱榻。睡透花梢紅日。耐半臂奇溫。一身憐惜。料得憑闌凝盼。送水蘭漿破遙天碧。回眸處幾度斷收紅雨。遠山濃濕。悄

立。錦屏人聞歎息。銷受柳昏鶯軟。花煩蝶困。風纖燕側。一井情絲堆積。怕不是東風無氣力。吹不轉蕩子天涯。子規時節禁得。

催雪

本意

徑沒蒼苔。庭無積葉。盡作雲階月地。似天上飛瓊。下臨塵世。偏愛竹籬茅舍。有野鶴寒梅爲姬侍。江天淒緊。千山人絕。漁舟獨去。休去。且教住。倘沾酒得魚。同來索句。先翦碎詩鬪。滕王蝶翅。吟罷蝦鬚高捲。笑輕薄楊花無才思。謂新詞不減四愁。伸紙瓊瑤盈字。

換巢鸞鳳

七月初六日。詠牛女。

只隔今宵。悵銀河未沒。欲渡無橋。細風吹鵲尾。淡月上牛腰。初秋那更夜迢迢。則今已愁來宵那遭。離情久。怕說起好期將到。機絞。愁

未了。天津畔收拾牛衣早。河鼓頻催。錦梭方擲。打點相逢話稿。今夜今年恁多長。雙星雙盼偏難曉。天孫辛苦。明朝莫乞新巧。

東風第一枝

春雨

空館留寒。深閨冷夢。沈沈斷送春暖。暗銷花事紅稀。添濃柳條綠淺。殢人無力。低不起草柔風軟。幸海棠繡幕深遮。不透紫衣輕燕。疎刺刺紙楞窗眼。撲簌簌水紋簾面。關情何處偏多。門掩黃昏小院。羅巾濕盡。細細織春愁如線。再相逢百舌喉乾。約到黃梅時見。

念奴嬌

和東坡赤壁韻二首。

周郎年少。想當日眼底曹劉何物。萬古長江流不住。吞盡東南半壁。鸚鵡洲寒。洞庭葉脫。正好鱸如雪。得魚沽酒。臨江共弔奇傑。空留

無主江山。多情沙草。依舊東風發。吳楚英雄流水去。漁火半明半滅。
黃石磯頭。白蘋波裏。折戟生苔髮。南飛烏鵲。曾噪魏室明月。

其二

江山千古。渾不改一派煙波雲物。白浪黏天天接水。冷似畫圖粉壁。
幾徧旌旗。數行鷗鷺。眼破蘆花雪。漁家守網。閒話南國人傑。笑殺
銅雀癡翁。小喬嬌婿。相顧雄心發。野草紅霞連夜火。儘付寒濤蕪滅。
金馬閒人。醉攜翠袖。戲摘山僧髮。浩歌長嘯。猶憶壬戌秋月。

長歌四闕。次信弦韻。

長歌擊石。看風翻花笑。竹搖金碎。飽食拋書眠跂脚。脫轡不煩廷尉。
蠶老花香。燕來筍出。遇此能無醉。秫田初種。平生願可能遂。逢場
謔月嘲花。拈毫信手。滾滾閱而肆。苦瓠爲羹菱作飯。絕勝紅銷虬鱗。
磨蝎填宮。貪狼照命。運退逢輿鬼。榮枯萬事。大槐根轟騰睡。

二

何須髮指。令酒徒髮指。羈孤心碎。眼底須眉少男子。半是寺人中尉。
捫舌空存。折腰可耐。去去吾甯醉。芰荷可製。遂初賦。今初遂。已知
骨相無侯。升沈久定。莫詣君平肆。蔬食清齋魚腊斷。懶著書成斫鱸。
烏有身名。諾臯身世。姑妄空談鬼。不如乳鴨。向池塘綠陰睡。

三

滑稽狎世。笑殿中檻折。正言衣碎。提酒旗亭歌絕句。壓倒龍標仙尉。
入覲釀王。出藩歡伯。帝有鈞天醉。糟邱可老。菟裘計豈難遂。焉能
逐取乞兒。侯門獻笑。呈技如凶肆。三泖四鰓魚恣噉。莫管胸留生鱠。
忽憶故人。瘴煙搖穴。作吏如猫鬼。清樽且酌。照海棠夜深睡。

四

酒酣起舞。驚山香亂落。浮萍吹碎。秉燭清遊長達曙。那顧夜行亭尉。

北客休談。西湖雖好。萬事無過醉。羸羊世網。不能退焉能遂。身輕
却喜無官。歌呼蒲博。貧賤真堪肆。濠上會心儵卽我。夢破魚頭人鱸。
畜隻鷓鴣。黃魚時節。頓頓殮烏鬼。飽眠一寤。不睡龍缸禁睡。

解語花

無題

鴉頭婢散。鳳背釵橫。紅蠟花低亞。絳幃開也。銀燈背。羞澀羅衣未解。
輕顰可畫。怕瘦損腰肢難把。不分明花氣參差。嬌輔清於麝。銷受
錦衾良夜。憶梅花紙帳。單枕巫峽。相逢未嫁。驕夫壻不是援琴司馬。
春宵一霎。約略記雨纔雲乍。驚畫眉紅日花梢。喚美人醒罷。

美人捧茶和弇州韻

南冷月小。北峒山高。甲坼驚雷細。翠鐺影入雙蛾綠。皓腕碧旗初試。
乳珠雪蕊。三沸盡笙簫如縷。要玉人仙掌奇擎。色授嬌波意。小顚